

30 OCT 2003

MAHATHIR-KEWANGAN

SISTEM KEWANGAN ISLAM AKAN DIBANGUNKAN SEBAGAI PASARAN KHUSUS

KUALA LUMPUR, 30 Okt (Bernama) -- Datuk Seri Dr Mahathir Mohamad berkata bahawa sistem kewangan Islam, termasuk perbankan dan pasaran modal Islam, akan dibangunkan sebagai pasaran khusus yang strategik.

"Kita akan memperkenalkan lebih banyak produk yang secocok dengan ajaran Islam dan yang inovatif di samping menambah produk asas dengan menggerakkan aset Islam yang belum digunakan," kata Perdana Menteri ketika membentangkan usul mengenai kajian separuh penggal Rancangan Malaysia Kelapan (RMK-8) di Dewan Rakyat hari ini.

Beliau berkata, inisiatif juga akan ditujukan terhadap membangunkan pakatan strategik dengan sumber-sumber kewangan masyarakat Islam global dengan peluang pelaburan berteraskan Syariah.

Dr Mahathir menegaskan bahawa sejak pengenalan sistem perbankan Islam 20 tahun lalu, Malaysia telah mencapai banyak kemajuan dalam mengembangkan produk-produk perbankan, deposit dan pembiayaan.

"Ini memberi pilihan bagi sesiapa, Islam atau tidak Islam, memilih sistem yang sesuai dengan selera mereka."

"Pada penghujung bulan Jun 2003, aset perbankan Islam telah meningkat kepada 9.4 peratus daripada jumlah keseluruhan aset sektor perbankan," kata Dr Mahathir, yang juga Menteri Kewangan.

Mengenai pertumbuhan sumber baru dalam sektor perkhidmatan, Dr Mahathir berkata, sektor perkhidmatan terus berkembang pada kadar purata 4.7 peratus dalam tempoh kajian semula RMK8, yang sebahagian besarnya disumbangkan oleh sektor kecil pengangkutan, penyimpanan dan komunikasi serta sektor kecil kewangan, insurans, harta tanah dan perkhidmatan perniagaan.

Menurutnya, pendidikan, pelancongan, kewangan Islam, kesihatan, pengangkutan, perkhidmatan perundangan dan profesional di samping perkhidmatan berkaitan dengan teknologi komunikasi maklumat (ICT) dan pembuatan akan dieksploitasikan bagi menghasilkan potensi yang sepenuhnya agar dapat menjana pertumbuhan ekonomi dan menyumbang dengan lebih ketara kepada pendapatan eksport.

Katanya, pertumbuhan industri perkhidmatan akan dapat dipercepatkan memandangkan kebanyakan kemudahan infrastruktur yang berkaitan telah sedia wujud.

Menyentuh soal pelancongan, Perdana Menteri berkata, kerajaan akan mengambil langkah untuk mempromosi pelancongan tempatan dan antarabangsa serta mempertingkatkan inisiatif bagi pembangunan produk pelancongan.

Antaranya, katanya, pendidikan, kesihatan, sukan, pelancongan berasaskan pertanian dan ekologi akan dimajukan lagi untuk memaksimumkan potensi industri pelancongan.

Dr Mahathir berkata, keunikan warisan budaya Malaysia juga akan diberi tumpuan dalam melaksanakan langkah berkenaan dan bagi mempromosikan tempat kebudayaan dan warisan asli, usaha akan diambil untuk memasukkan Taman Negara di Semenanjung Malaysia, Gua Niah di Sarawak dan Lembangan Maliau di Sabah di samping Bandaraya Bersejarah Melaka dan Pulau Pinang sebagai Tapak Warisan Dunia.

Menurutnya, pelancongan tempatan juga akan ditingkatkan melalui pakej nilai wang yang menarik, dengan kerjasama syarikat penerbangan tempatan.

Aktiviti pemasaran dan galakan akan ditumpukan kepada meluaskan pasaran pelancongan dengan mengekalkan pasaran sedia ada dan membangunkan pasaran baru yang telah dikenalpasti, katanya.

Katanya, misi penggalakan pelancongan akan dihantar ke Asia Barat,

Amerika Syarikat, China, India, dan Jepun manakala tarikan jualan yang unik bagi industri pelancongan akan terus dipasarkan berdasarkan slogan "Malaysia Truly Asia".

Untuk meningkatkan lagi tarikan Malaysia sebagai destinasi membeli belah, usahawan akan digalakkan untuk meningkatkan usaha bagi mendapatkan agensi pengedaran bagi produk pengguna dan jenama antarabangsa yang baru dan yang baru muncul.

Selain daripada itu, Perdana Menteri berkata, kemungkinan untuk mengadakan penerbangan antarabangsa secara terus daripada beberapa bandar terpilih akan diterokai untuk memudahkan kemasukan ke destinasi membeli belah bebas cukai dalam negara

Pada tahun 2001, jumlah ketibaan pelancong adalah sebanyak 12.8 juta, melebihi 6.5 peratus daripada sasaran manakala pada 2002 meningkat kepada 13.3 juta iaitu melepasi 10.8 peratus daripada sasaran.

Bagaimanapun, kata Dr Mahathir, akibat pencerobohan Amerika Syarikat ke atas Iraq dan wabak SARS, ketibaan pelancong telah menurun sebanyak 31 peratus bagi separuh pertama tahun ini tetapi sejak beberapa bulan lepas, arah aliran jumlah ketibaan pelancong semakin meningkat.

Perdana Menteri juga berkata, lebih banyak produk dan perkhidmatan pelancongan yang berkualiti akan diadakan sebagai usaha untuk meningkatkan jumlah ketibaan pelancong seperti memperkenalkan persijilan "Blue Flag" dan "Green Globe" kepada tapak pelancongan.

Blue Flag akan diberikan kepada pantai yang menepati piawaian antarabangsa, manakala "Green Globe" diberikan kepada tapak eko-pelancongan yang mengamalkan perlindungan dan pembaikan alam sekitar.

Dr Mahathir berkata, eko-pelancongan, agro-pelancongan dan pelancongan luar bandar akan terus dibangunkan untuk mengambil peluang sepenuhnya daripada keindahan pemandangan, kedamaian desa serta flora dan fauna.

Di samping itu, pelaksanaan program satu daerah satu industri akan meningkatkan penyertaan masyarakat tempatan melalui industri kraftangan yang dapat membekal barangan kraf kepada pelancong.

Bagi mempromosi industri pelayaran persiaran, beliau berkata, kerajaan akan terus membangunkan pangkalan kapal pesiaran atau marina di Pulau Pinang, Pulau Pangkor, Pelabuhan Klang, Port Dickson, Melaka dan Muar manakala terminal kapal pesiar di Melaka dan Pulau Pinang akan dinaik taraf.

Ini akan membolehkan kapal pesiaran dan bot untuk liburan belayar ke beberapa tempat yang menarik serta membolehkan pelancong terlibat dalam pelbagai aktiviti dan tinggal dengan lebih lama, katanya.

Di samping itu, katanya, jeti sedia ada dan terminal penumpang akan dinaik taraf bagi memastikan keselesaan dan keselamatan penumpang khususnya di kawasan di mana sungai merupakan jalan perhubungan utama seperti di Sabah dan Sarawak.

Menyentuh mengenai soal dagangan runcit dan borong, Perdana Menteri berkata, pasaraya besar akan digalakkan bekerjasama dengan pengeluar tempatan bagi mendapatkan sumber barangan tempatan yang berkualiti tinggi dan pada harga yang berpatutan.

Ini juga akan membuka peluang kepada firma tempatan terutama IKS dan pengeluar barang kraf bagi memasarkan produk mereka di dalam dan luar negara.

Katanya, penyertaan Bumiputera dalam sektor perdagangan dan pengedaran akan ditingkatkan dengan mengadakan program latihan piawaian kualiti produk, pembungkusan, penjenamaan dan pemasaran bagi memastikan pengeluaran produk adalah berkualiti eksport dan dapat memenuhi permintaan pengguna.

Beliau berkata, pembangunan kedai konsep untuk kedai lampu, dobi, penghiasan rumah, pasar mini, kedai sukan dan bengkel automotif akan dipertimbangkan.

"Jaya atau tidaknya semua ini bergantung kepada kesanggupan Bumiputera untuk memasuki bidang ini. Jika mereka enggan, janganlah sesiapa merungut kenapa tidak ada Bumiputera di bandar-bandar di Malaysia," kata Dr Mahathir. -- BERNAMA

MKO AHM